



11 Ya yapulilwa uusitagongalo mOngeleki yaElok

KuSebulon Ekandjo

Aalumentu aagundjukalela 11, oya yapulilwa oshilonga shuusita mOngeleki onkwaevaangeli paLuther yomOwambokavango eti 17.6.1984 mOngwediva. Aagundjuka mboka oya kala omimvo ne taa konakona elongo lyuuteolohi mOseminali ya hangana yOongelesi oonkwaevaangeli paLuther, muPaulinum, Otjimbingwe.

Konima yeilongo lyawo, Elelongeleki olye ya tumu meilongekidhilo lyoshilonga shopausita momagongalo gomOngeleki tuu ndjoka, moka ya kala mo uule woomwedhi hamano.

Natango kombinga yethimbo ndyoka, Elelongeleki olyu utha okangundu kokokonakona aaidheuli mboka owino wawo, nuunkulungu. Elelongeleki nalyo wo palufo lwalyo nopashitendwa oshiti XV shomEkotampango, olyi ithana aalongwa mboka noku ya konakona ontseyo yawo miinima yopakriste.

Opo mpaka nopaunzapo uukwawo wa gandjwa kokangundu ka pelwe oshimpwiyu, Elelongeleki lya mono omukumo okuzimina aagundjuka mboka ya yapulilwe oshilonga shuusita mOngeleki ndjika.

Omuyapuli okwa li omumbisofi gwOngeleki, Dr Kleopas Dumeni pamwe naayakuli ye.

Manga aayapulwa inaa ninga euvaneko lyawo okwiigandja meyakulo kehe taye li pulwa, euvaneko ndyoka hali ningwa

nokugana, omumbisofi okwe ya popitha nomatumbulo gamwe gomugo taga landula mpaka.

“Oshilonga sheni mu ELOK osho okuninga aayapostoli, oonzapo dha-Jesus. Otamu yi mongundu yaatumwa, yaasita yaayevangeliste noyaalongihapu (pahapu ndhoka omumbisofi e dhi lesa metetekelo Ef.4:11-12).

“Otamu ka hepa, tamu dhengwa, tashi vulika nokusa wo omolwevaangeli. Oshimpwiyu sheni nashi kale okulitha, okupalutha nokupopila oomwenyo dhaayakulwa. One aasita yoomwenyo omolwokutunga olutu lwaKristus.”

Omuwilikingeleki Dumeni, okwa kumagidha natango aayapulwa noohapu odhindji e ta hulitha epopitho lye nomatumbulo ngaka:

- Uusitagongalo owo okukala miilonga yOngeleki sigo eso

- Okukala omwiifupipiki nomuvuliki

- Omuyakuli haomuyakulwa nenge omusimanekwa.

- Okulalakanena ehupitho lyomwenyo gwomuntu kehe

Tala kep. 6



Efano ndika, oli li pomweelo gwombelewa yoshilonga shetumo, mOngwediva. Otali dhimbulutha aluhe ELOK oshinakugwanithwa she.

Oshigongingeleki shOngeleki ya ELOK shoka shi li ko petameko lyajuli tagu ya, oshi na omahogololo gaali ga simana.

a) Ehogololo lyomuwilikingeleki, ngoka methimbo efupi tashi vulika wo a ka ninge omumbisofi omutiyali mOngeleki ndjika.

b) Nehogololo lyiilyo iipe yElelongeleki, kape na mbudhi, kutya yamwe otaa zi natango miilyo iikulu mbyoka ya kala mo shito.

Nkene Ongeleki ELOK, tayi ka tsikila natango eyakulo lyayo mokati kiilyo yi vule ngashingeyi omayovi gomathele gatatu, ya halakana naNamibia alihe, otashi ku uthwa kiilyo yoshigongingeleki mbyoka tayi ka ganekela omahogololo ngoka gaali tage ya.

Uuna aahogololi taa ka ganeka ya dhiladhila onakuyiwa yOngeleki, yo inaa dhimbwa wo onakuziwa yayo nongashingeyi yayo, nena opo mpoka ashike pu na etegameno ewanawa.

Ngaashi tashi monika palwe moshifo shika, nkene iilyo oyindji yOngeleki meni nopondje itaayi adhikwa we keyakulo lyopambepo, nonando ye li yuulukwa, shoka osho omukundu gumwe tagu ka thigilwa miikaha yaahogololwa, Elelongeleki epe, li gu monene ondjila.

Ihe shono otali shi ningi mekwatathano nomapulo omakwawo kaage shi omapu ngaashi taga landula:

1. Nkene tapu dhikwa omahala gomayakulilo koombinga noombinga dhoshilongo nopwaa na okuhinda uukumwe wOngeleki oonkwaLuther muNamibia, nuunake tashi ningwa?

2. Nkene omahala ngoka taga monenwa aayakuli, pwaa na eihepeko enene lyelongitho lyiimaliwa nopwaa na wo oluhindo kuukumwe wAakwaLuther moshilongo, nuunake tashi ningwa?

Meni lyomapulo ngoka gaali ga tetekele, omu na wo natango iimpaga iikwawo yomapulo taga kwatelele mo uusosiale wiigwana yaNamibia nonkalo yopapolitika yoshilongo shika.

Pethimbo lyelalekathano lyiilyo yElelongeleki mbyoka ya kala melelo peha lyOshigongingeleki uule womimvo ndatu dha zi ko, euvito olya penduka mokati kiilyo mbyoka, kutya oya kala miilonga pethimbo edhigu. (Oshit. 291/1984 shElelongeleki).

Shoka otashi zinimwa komuntu kehe ha dhiladhila nawa. Ashike mpaka itatu sosa nando olye, ihe otu na oku shi yelitha

Kutya ethibmo edhigu oli li natango komeho twe li taalela.

Onke okushonopeka uudhigu wethimbo ndyoka tali ya, okutokola moshigongi shoka tashi ya omatokolo ga pya nawa momadhiladhilo noga kwatelela mo uuwanawa wOngeleki ayihe nenge woshilongo ashihe nokuli.

Pethimbo ndika ope na oshindji tashi ulike, kutya Ongeleki oyi na ngashingeyi iinakugwanithwa iinene ye yi thikamena, inaayi kala nayo shito nokape na uuyeleele wa gwana, oshini po shi shi okulongwa po tango. Mpoka ope na endhindhiliko lyekoko lyOngeleki.

Ihe okupopya ngeyi, hasho ando okugandja uusama ku nima nenge kungandi, moshinima shoka unene tuu mboka ya kala mewiliko lyOngeleki, aawe. Mpaka okuholola owala elunduluko lyethimbo kutya osho lye endeleele ngaaka nolya thigi po oompangelathaneko dhOngeleki.

Otwa pumbwa ano aanashilonga aanandjingu momadhiladhilo naapethimbo miilonga, opo ya tidhe elunduluko lyethimbo ndyoka lye tu thigi po, Ongeleki yi wape ihe okutsakaneka omalunduluko omakwawo ngoka tage ke ya yi li natango mukolele wopambepo, nowopasosiale nowopamahupilo.

Galikanena ano oshigongi shoka.

Sebulon Ekandjo

EIMBILO LYOMUSASELI SAKARIA MOLUPE LWEHAMBELELO

Luk.1:68-75



OSOONDAHA ONTINTATU YEGALIKANO

Omuwa Kalunga kalsrael na hambelwe, oshoka okwe ya okuhupitha nokumangulula aantu ye. Okwe ya longele ekulilo nokwe tu tumbile o-lwiinga lwehupitho omegumbo lyaDavid omuntu gwe

Omagongalo omanene mu ELOK payalulo lyomumvo 1983

Omagongalo otaga landula mpaka, mugo otamu vulu okutopolwa omagongalo gane sigo gahamano mukehe egongalo. Aakwanegongalo yago ohaa ohaa ende ookilometa 15 sigo 20, uuna ya pumbwa eyakulo lyomusita. — Galikanena Omuwa a tume aalongi mepya lya ELOK.

Egongalo	Aakwanegongalo
1. ONAYENA	11385
2. OKAKU	10424
3. OHALUSHU	10146
4. OKAHAO	9837
5. ONYAANYA	9185
6. ONGENGA	8925
7. OSHIGAMBO	8404
8. ENGELA	8290
9. ENDOLA	8209
10. EHEKE	7802
11. TSHANDI	7565
12. NAKAYALE	7438
13. OKALONGO	7299
14. ONTANANGA	7093
15. OLUPANDU	6954
16. ONHELEIWA	6911
17. ONDOBE	6825
18. OSHITAYI	6918
19. ONANGALO	6370
20. OLUKONDA	6301
21. OSHAANGO	6102
22. EENHANA	6082

Omagongalo gaali omashona mongeleki ogo ngaka omagundjuka:
Nepara 705
lipandayaamiti 695

Omagongalo ngaka ogo gamwe omashona mu ELOK, iilyo yago tayi vulu okwaadhikwa nuupu keyakulo lyomusita, ethimbo kehe.

ESO

Omukulupe Kwedhikunene kwaNamwandja, Emono, Onayena, okwa manene oondjenda dhe 29.2.1984 mepipi lyoomvula 115 lwaapoka. Okwa thigi ko oyana yahetatu naatekulu naatekulululwa oyendji.

T. Mbwiti Mbeeli

Ngaashi sha yelithwa movelise ya tetekele 67, omatumbulo ngaka nomakwawo ga landula, oga zi menwethomo lyOmbepo Ondjapuki. Oshitewo shika ohashi ithanwa **Benedictus**, shoka tashi ti 'ehambelelondjimbo'.

Momufudho nguka, Sakaria ota holola shoka omeho ge gokomwenyo ge shi mu pe, kutya nani Kalunga ohe ya monkalamwenyo yomuntu nenge yaantu. Ov.68-75.

Memoniko ndika, Sakaria oku lwete nale oshilonga shaJohannes, shoka te ke shi longa moshigwana. Euvitho lye-vaangeli, olyo oshinakugwanithwa she.

Aluhe momathimbo guudhigu, Kalunga okwe ya muudhigu waantu. 2Mos.4:31; Rut.1:6 Eps.105:8, onke Sakaria mpaka wo ote shi hempulula: Kalunga e ya okutala aantu ye. Ov.68

Okwe tu tumbile okwiinga lwehupitho. Ov. 69

Endhindhiliko lyolwiinga megongalo lyAajuda, olyo oonkondo itadhi i-nyengithwa kusha ndhoka tadhi gandja ekwatho lya pumbiwa. Olwiinga megumbo lya David, otashi holola, ehupitho ndyoka olya zi mezimo lyaDavid.

Ngaashi a lombwelitha omakana gaaprofeti muuyuni wonale Ov. 70-71

Sakaria mpaka ngiika ota dhiladhila shoka sha popiwa nale komuprofeti Malakia 3:1-3;4:1 Yeleka wo naJesaja.40:3-5

Kalunga iha li ongunga yomuntu. Omauvaneko ge agehe ote ga tsakanitha pethimbo lye mu opalela. 2Mos. 2:24 Jer.11:5 Eps.105:8.

Amonithile ootate olukeno Ov. 72

Ehupitho lyaKalunga komuntu

oshilonga shesilohenda, ihashi zi miilonga yomuntu. Oonakulo-ngelakalunga ayehe, otaa longo, molwashoka oya dhimbulula ehupitho ndyoka ye li longelwa. Ano itaa longo opo ya hupithwe, aawe. Uuyuni auhe, ngaashi oshigwana shaIsrael wo, oshi li naanaa pehala ndyoka - okutegelela esilohenda lyaKalunga olyo li longe. Sakaria okwe li dhimbulula nokuli, kutya olya thiki. Ootate oya silwa olukeno....

Egano ndyoka e li ganene tate yetu Abraham Ov. 73-75 Tala oovelise 70-72

Elongelokalunga lya simana, okudhimbulula iilongankondo yOmuwa mokati kaantu, oshinima shoka tashi pendutha ehambelelo itaali zimbuka.

Sebulon Ekandjo

ESO

Omutekulu gwokombanda gwaNangolo dhAmutenya, Nendongo lyUugwanga, okwa manene oondjenda dhe 7.5.1984 megumbo lye mOnamenye, Oniipa. Okwa hulithile mepipi lyoomvula 98.

Okuza omumvo 1915, Nendongo okwiitedhulula nokwa shashwa Petrus. Okuza kesiku ndyoka, okwa kala omukriste ependa mokulonga yalwe uukriste, mokugalikana nomokwiimba sigo eso lye.

Okwa thigi ko oyana 12 nomukulukadhi gwe omutiyali gwotango sho kwa adhika a tetekele nale kegumbo lyomegulu.

XX

Aakalimo yatatu yomOshaango, mOndonga, oya mana oondjenda dhawo ombaadhilila moshiponga shoboma 25.4.1984. Oyo Isak Kanime (48) ngoka a thigi ko omukadhi naanona yahamano, Feni Tangenomuwa Kamati (5) naAlbertina Shimhanda (55).

F. B. R. Kamati

Exungomwenyo monghalafano yefiku keshe.

ETWIKILO:

KuAune Shilongo

4. Oivelekimwenyo yopayakulo lopanghalafano.

Omhepo youshondolo mounona, movanyasha moomeme nomootate, otai tameke omikifi dokeemwenyo. Eemwenyo dihapu otadi keme notadi lili.

- Oukwatya womeendingosho, momalukanda nomeedoolopa itau eta ashike oudu wokolutu ndele unene wokeemwenyo.

- Okukana kwohole yopaumwainafana, yopakriste noyopanghalafano okwa londa, nondilo yomunhu kai po vali.

Ovanhu vahapu ova efiwa va ekelwashi noitava talika vali, ngaashi ovakulupe eehepele, ovanaudu ounona vovadali vehe li mohombo noingudu.

- Okuhayakulafana, okuhatumwa, okuhaendafana, noupongo nouwike monghalafano oya hapupala.

5. Oivelekimwenyo yopanghalomwenyo yopaukwaumbo

Mwaashi odi udite, omu shii shihapu mu dulenge, shapu ohatu endululeni pamwe. Omukifi wa kula owo, ekalando lohombo. Ohombo otai kalanda unene nge ohole yotete ya talala.

Sha, she ya pokati kovanahombo, ongee okuya pondje yohombo kwaumwe ile oukwapata ile okuhakala moshili mokulongifa oiniwe yeumbo, ile pe na okuhayakulafana moilonga, okuhakundafana ile okatongotongo. Okunwa kwa pitilila kwa holoka mu umwe womeumbo otashi dulika ku etelele oinima ihapu meumbo, oluhepo, okuhapopya okuhadulika kwounona osho yo ounghundi mefiloshisho leumbo.

6. Oivelekimwenyo yopawiliko palandulafano nolopangudu.

Okukala omuwiliki kashi fi shipu, oto shakeneke ei tai veleke omwenyo tai di mwoove mwene ile tai di pondje ngaashi onyalo, oshiningilewina nodino yovawilikwa.

Omatukano omalwaambo nokatongotongo kongudu. Okuhaudafana nokuhakundafana moilonga ile mongudu. Okuhatula oukuni kumwe kwovalongipamwe. Okuhatula nawa oilonga melandulafano.

Okuhalongwa sha wana kwomuwiliki otashi dulika shi kale omukundu. Ewiliko pefimbo lopaife otali pumbwa eputudilo lalo, ha pamaano ashike omedalo.

Eliyelifilo

Nakuvela keshe oye mwene eshii osho ta vele. Noye mwene ta dulu okufatulula ouvela waye. Ota shiiva ota vele shike, oku udite ngahelipi nokwa tameka naini nongahelipi. Ope na tuu vamwe hava nyengwa okuliyelifila ndele navo ohava ka yeelwa mexungomwenyo mwoovene.

Omuveli ota pumbiwa yo okutala opo tape mu dile ekwafo. Uunene okukonga omukwafi we mu lineekela, otashi dulu oku ku kwafa.

Exungomwenyo

Exungomwenyo kali fi etwalo leenghundana ile ekongo leenghundana. Loo kali fi elopotafano ile okwaambafana. Ndele oyo omhito ile ondjila ile omukalo wokuhakula omwenyo tau vele. Pe na sha tashi veleke omwenyo.

Mexungomwenyo eshi shi na ondilo oshosho tashi ningwa po pokati komuxungimwenyo nomuxungwa koshipala shaKalunga. Naasho tashi kwafa exungomwenyo li kale exungomwenyo osho:

Elineekelafano: Osha pumbiwa okukonga ekwafo kwau we mu lineekela. Nge kape na omulinekelwa nasho omukifi. **Okumangulukilafana meenghundafana.** Oumbada ile etilo mexungomwenyo omukifi itau veluka.

Okupwilikinafana: Exungomwenyo olo okweendondjila pamwe mofuka yonghalomwenyo yomukwafwa, opo tapa pumbwa aveshe vavali va pwilikinafane.

Okukala moshili: Osha pumbiwa okuhokola oshili youvela nokutala yo

ehuku loshili youvela naasho sha pumbiwa.

Okulonga pamwe: Exungomwenyo kashi fi ekwafo lefiku limwe, ndele olo oshilonga tashi twikile fiyo eveluko. Hamukwafi ashike ta longo ndele otava longo pamwe nomukwafwa, opo sha pumbiwa panghatu nonghatu.

Ewiliko kOmhepo Iyapuki: Omhepo Iyapuki oye omuyelifi nomuvongokononi wolela.

Omuti wokuhakulomwenyo.

Mexungomwenyo omunhu ota yandje sha nota likola sha. **Sha** osho ta likola notashi mu kwafa osho omuti ngaashi: Elimatulomwenyo omo to mono edimepo lomatimba, epaafanombili, efudile mo lomhepo ipe, elikolo lohoole yoshili nelididimiko.

Eitavelo nelineekelo leenghono daKalunga. Eilikano neendjovo daKalunga. Omukumo womeni, eudeko lomunhu mwene nolomunhu mukwao, nefikoshitwa shelalakaneno lexungomwenyo.

OKUNWA KWAMEME IIHUNA

Muuyuni wookuku, kape na ngoka ha popile okunwa kwameme. Omalovu giilya nale oga longithwa kashona kaakiintu. Iikunwa iidhigu inayilongitha nenge inaa pitikwa ye yi longithe.

Pethimbo ndika, aakiintu oyendji otaa monika taa longitha iikunwa, konyala ye vule naalumentu. Omukiintu ha nu okwa kanitha oshindji. Mpaka otapu landula iinima yimwepo ashike:

Omukiintu ha nu, uukuluntu we okwe u dhimbwa, oha popi shaashoka ihaashi popiwa komukiintu. Ke shi we okupalutha egumbo lye, ke shi okuputudha oluvalo. Ke na oondunge dhokuyamukula omusamane gwe.

Omukiintu ha nu ke shi okukunda aayenda ye ya po pegumbo. Iha dhiginine iilonga yegumbo. Oku na uupu okuyota po egumbo. Oshini nelugo lyomukiintu ha nu, otayi imonikila, nkene ya shunduka.

Lagwenene otu na natango aakiintu moshigwana shika, taa dhiginine omagumbo. Otaa mu omboga, otaa hongo oombiga, otaa tungu oontungwa, taa kolo yo taa tende oongongo, taa teleke oontanga ya mone omagadhi.

Omolwaakiintu mbaka omapenda, oshigwana osha thikama po notashi tsikile muukolele weputuko nowomahupilo. Aakiintu ayehe otaa hiywa ya landule oshiholelwa shaambaka.

**Omukiintu mukweni,
Shihenda**

OHAPU YAKALUNGA NUULELIGUMBO

Ope na ooshili dhopaali ndhoka tadhi popi uuleligumbo. Onke nena otwa hala tu tale shoka Kalunga te tu ulukile moohapu dhe. Shika ohatu shi ningi, oshoka tse otwa hala mwaashihe tatu shi ningi, tu kale tu na omukumo kutya Kalunga naye ote tu popile uuna tatu tsakanekke mboka ya hala ye tu sithe uunye mushoka tatu longo.

Ondjila yetu yokumona epopilo lyaKalunga, ohatu yi adha owala mOmbimbeli Ondjapuki. Ohela yoyene manga ndi na edhiladhilo nokuli ndi shange okanyolwa hano, onda tsakanekke omusamane gumwe Omutiligane, Omundowishi ngoka nda li nda kala naye owala okathimbo kominute ngiika omulongo, ngele odhindji.

Omusamane nguka e na iilonga yokufolomaneka yalwe nomulumentu omunandunge mokutala, onde mu pula ngele ohaa ningi tuu owandaha piilonga yawo. Epulo ndika olye mu nyanyudha, oshoka onda koneke nkene a kala e na ondjuulukwe opo a mone omuntu te mu pula sha shuukriste, oshoka oku na sha okunyenyetela aakriste, aniwa unene tuu sho Ongeleki ihaayi gandja iimaliwa yo hayi longo aantu ya fute ngele taa shashwa.

Okwa ti wo kutya, aniwa Ongeleki otayi longo aantu ya ninge omagoya yo taa si oluhepo. Omusamane nguka okwa holola ngaaka kutya okwa shashwa (a shashelwa peke) ihe ina itaala mo sha, (nando kombinga yandje nda koneke omusamane nguka kutya ye mwene okwiitaala miimaliwa, oshoka ethimbo alihe okwa kala ta popi oshitya "kapitaal", shoka tashi ti iimaliwa neliko).

Ngaashi nda li ndi uvitile omusamane ngwiya ohenda nolukeno, sho kee shi mpoka e li mekwatathano naKalunga noneshito mundyoka ye a tulwa mo nelalakano opo a tonatele iinima yamwene gwaayihe, osho wo ndi uvitile ayehe yomongundu ndjoka ohenda.

Onke longekidha ano okampito haka u tale omishangwa omiyapuki shoka tadhi ti kuuleligumbo.

1. Kalunga oye He omushiti gwaayihe.

Evi olyOmuwa noshaashoka shu

udhilila mo, nooha dhuuyuni naamboka ya kala mo. Eps.24:7

2. Aakriste oyo aanegumbo lyaKalunga.

Oshoka one amuhe aana yaKalunga kokwiitaala muKristus Jesus. Ano ku shi we omupika, aawe, ongoye omwana. Ihe ngele omwana, nena omuthigululi wo molwaKalunga. Gal.3:26;4:7

3. Aanegumbo oye ninathane oshinakugwanithwa

Yakulathaneni kehe tuu shi thike pomagano ge e ga pewa, ongomalenga omawanawa gomaganohenda gaKalunga gi ili nogi ili Kalunga opo a simanekwe mwaayihe omolwa-Jesus Kristus. 1Petr.4:10-11

4. Omukriste ota pulwa evuliko

Oshoka kehe tuu ngoka a pewa oshindji, oye ta pulwa wo oyindji. Luk.12:48

5. Omauvaneko ngoka tu na ga kola

Ano Kalunga ngele ta zaleke ngeyi omwiidhi gwokelundu gwa thikama nena, nongula otagu umbilwa meziko, ite shi mu ningile unene one tuu mboka yeitaalo efupi? Mat.6:30

6. Eyakulathano oshinima

shopambepo shi vule iimaliwa

Nando ya li momamakelo ogendji guudhigu, enyanyu lyawo nomolwoluhepo lwawo olunene olyu udhilila ngaashi okomwenyo omwaanawa ya gandja omagano omanene. 2Kor.8:2

7. Okugandja memanguluko okwiikwatelela keigandjo kuKristus nokooitaali ooyakweni.

Ihe tango oyi igandja yoyene kOmuwa nokutse wo kehalo lyaKalunga. 2Kor.8:5

8. Okugandja memanguluko okwo okulola ohole yomuntu

Ano sho tamu ya monithile ohole yeni, notamu holola nokutya, eitaalo lyetu omolweni, olya tsa, otamu shi ningi montaneho yomangalo. 2Kor.8:24

9. Omukriste na gandje nyanyanyu nonemanguluko

Kehe ngoka na gandje ngaashi omwenyo gwe tagu mu lombwele, hanuundjamukudhi nenge kethiminiko. Oshoka Kalunga e hole ngoka ta gandja nyanyanyu. 2Kor.9:7

10. Uunzapo uukwawo mEtestamendi Epe

Esiku lyotango lyoshiwike kehe tuu gwomune na pungule sha maandjawa palikolo lye. 1Kor.16:2

S. V. V. Nambala



Uuyuni auhe osho u li ngeyi peke lyaKalunga

11 YA YAPULILWA MOSHILONGA

Dha za kep. 1

moondjo mboka taye dhi hempulula noku dhi thigila po mboka taye dhi tindile.

“Inda u ka tsakanithe oshilonga shoye.

Yambekwa, opo u yambeke.”


IININGWANIMA YILWE MOSHITUTHI SHOKA

Kakele koshitayingeleki shaKavango, shoka sha li inaashi holoka moshituthi, aakriste oyendji oya li ya zi kiitayingeleki ayihe yomOwambo. Oyendji yomuyo egongalo lyaNgwediva naakwanezimo lyaayapulwa mboka ya zile komagongalo galwe.

Elongelokalunga lyOsoondaha ndjoka, olya ningwa mekwatatelokumwe noshituthi sheyapulo. Yaali yomaayapulwa; Eliakim Shaanika naAdolf Hashikutuva, oyo ya li ya ningi elongelokalunga.

Tomas Ndiwakalunga (naye omuyapulwa) okwa ningi euvitho patekisti yesiku paJoh.3:1-15. Omusita Matti Amadhila, omutonateli gwoshitayingeleki shUuninginino okwa popitha oshituthi.

Omusita gwegongalo lyaNgwediva moka mwa ningilwa oshituthi, nomutonateli gwoshitayingeleki shoka, omusita Apollos Kaulinge oya tumbula wo sha koshituthi. Ihe manga inaaye shi ninga, omusita Jonas Mweutota, okwa gandja tango epandulo peha



Egongalo lyaapopi yOshiwambo mOsitata, ngashi hali ithanwa mOvenduka, Oosoonndaha odhindji, aantu oyendji ohaa uvu omambo ye li othika, omolwothina yOngeleki ndjoka. Yamwe ohaa ende ookilometa konyala ntano, okuthika pehala ndyoka, sho taa zi kOkatutura. Mefano ndika, omumbisofi Dumeni ote ya laleke, ya shune komagumbo, sho e ya ningile elongelokalunga.


- Okwiimatula omwenyo ongoshinakugwanithwa

- Okutopola Omasakramendi panko-


ndo ndhoka tamu dhi pewa Joh.20:20-21.

- Uusita owo okuuvitha evaangeli palongo lyaJesus. Okumangulula


MBAKA OYA MANENE OONKONDO DHAWO MEYAKULO LYONGELEKI, NGASHINGEYI OTAA LI OSHIKWIILA SHEVULULUKO



Omusita Vilho Kaulinge




Omusita Ismael Nhinda,



Omusita Paulus Shijagaja



Omusita Paulus Nailenge



Omusita Erastus Shilongo

Dha za kep. 6

Iyooyakwawo ayehe ya yapulilwa oshilonga omolwompito ndjoka ye yi pelwe kOngeleki, nokekatho lyaKalunga ndyoka lya kala pamwe nayo ethimbo alihe lyeilongo.

Uunene woshilonga noluhepo lwaayakuli.

Okangundu kaanashilonga mbaka aape 11, oke ya mehwata lyaasita 128 yOngeleki ya ELOK. Aasita omulongo yomethele nomilongo mbali nayahetatu otaa li oshikwiila shevululuko, oonko-



Omahala ogendji mUushimba, kapu na omatungo gOongeleka dhaapopi yOshiwambo, onkene ohaa gongalele ashike shaampoka. Mbaka oye li melongelokalunga, haa zi mokomboni yaVenduka, ndjoka hayi ithanwa Osiingela. Ohaa yakulwa komuye-vaangeliste Elise Ndume, gumwe gwaamboka yaali ya thikama kolumoholela.

ndo dhawo dhopalutu sho dha pupo.

Aasita 81 oyo ayeke ya adhika taa viyauka natango nomagongalo 71 ngoka ge na ngashingeyi omwaalu gwakriste 336,849 payalulo lyomumvo 1983. Omahala ogendji momagongalo ngoka otaga longwa natango naanaa pamukalo gwetumo lyomeni.

Elondo lyomiyalu dhaaitedhululi nodhaashwashwa koombinga adhihe dhOngeleki, odho uunzapu wa kola moshinima shoka. Omumvo 1983 okwa shashwa aapagani 2,971 pamwe nuunona wawo., Megongalo limwe alike, omwa shashwa aapagani 192 pamwe nuunona wawo.

Ongeleki oyi na omatompelo gokupandula Kalunga sho ta pepitha ombepo ye maagundjuka yoshigwana shika, opo ya yuulukwe ngeyi okwiigandja meyakulo, ndyoka pameho gopantu itaali zile nando omuntu uuyamba nenge esimano.


Ihe mokutala wo uunene wepya meni lya ELOK, omuntu otashi ku pendulile oshimpwiyu oshinene nkene iilyo yOngeleki ndjoka nayi ka monenwa aayakuli ya gwana.

Pehulilo lyomumvo 1983, opwa ndhindhilikwa omagongalo agehe 22 kutya oge na aakriste ya konda omayovi gahamano sigo omulongo nalimwe (6000__11,000) Omadhina gomagongalo tala palwe moshifo shika.

Omolwoluhepo lwaasita omagongalo ngoka ogendji gomugo, otaga lelwa

ashike komusita gumwe, peha lyaasita yaali nenge yane. Omolwoluhepo lwaasita omagongalo ngoka oga ningwa ashike egongalo limwe, peha

Tala kep. 8



Omusita Andreas Kanhalelo, oku li moshipundi shevululuko, ihe omolwoluhepo lwaasita, ota litha natango ondjakulwambinga, Onkani megongalo lyaNaanda.

Dha za kep. 7

lyokutopola mo omagongalo gane sigo gatano nokuli.

Iilyo oyindji yOngeleki ngaashi ya tumbulwa metetekelo, moongamba dhomagongalo, kayi li mo we palutu. Omwaalu omunene gwaalumentu, gwaagundjuka naafuko pamwe nuunona wawo, ogu li ngashingeyi nUushimba auhe.

Oyendji yomuyo ihaa mono we omayakulo gopambepo nenge omayakulo ohaye ga mono ashike omalupita. Ihe mokati kaantu mboka enota lyOhapu yaKalunga omo li li enene. Aasita naayevangeliste mUushimba, nando taa kondjo oonkondo dhawo itadhi gwanene we eyakulo lyaantu mbeyaka.

Kape na ngoka ta vulu ngashingeyi okutengeneka oshiponga shoka nashi ke ya po moshigwana mpoka shi thike uuna aagundjuka mboka, Ongeleki yokomeho, taa ka kanitha ohokwe yokupulakena oohapu dhaKalunga.

“Kandi uvite ko Ongeleki yi ipyakidhila ashike naakulupe momagongalo, mboka oyendji ya kola nale meitaalo lyawo, manga tayi etha aantu mboka ya pumbwa shili




Omusita Johannes Gweendama, omumvo dhe odhi vule ngashingeyi 60, ota lele egongalo Omulonga li na iilyo 2 882 nomahala gatatu ngoka haga faalelwa omauvitho kee na omuyakuli. Pethimbo ndika, ota wilike etungo lyOngeleki. Iilonga mbika ote yi longo nuupendha tau kumitha nonando uukolele wolutu nomimvo dhuuka pombanda itayi shi pitika aluhe. Shalongo omapenda ngaka twa li tu ga na natango mokati ketu.

Tala kep. 9



Konima yookilometa konyala eyovi limwe, muCaprivi, muuzilombangalantu waNamibia, iilyo ya ELOK noya ELK, oya adhikilwe komusita gwaaniilonga mUushimba, Gerson Max 1982, ya ponga noya kanitha etegameno lyekwatathano nOngeleki dhaandjawa. Mefano ndika, pokatilela, Max ota monika e li moonkundathana nayo oku ya kolekela natango meitaalo lyawo.

NATANGO OLUHODHI



Nakusa Filippus Uusizi

Manga ombelewa yOmukwetu yi ipyakidhila nokulongekidha oshifo shoka tashi hokolola unene iilonga yaasitagongalo mOngeleki ndjika, onkundana yoluhodhi oya thiki ishewe mpaka, kutya omusitagongalo Filippus Uusizi, okwa hulitha oondjenda dhe eti-25.6.1984.

Omusamane Uusizi okwa pitile osikola yuuyevaangeliste mOniipa 1943. E ta yapulilwa uusitagongalo 1974 mEngela konima yelongekidho efupi. Okwa longo ethimbo ele mOlukonda, omuyevaangeliste nokonima sho a yapulilwa uusita, okwa ka dhika egongalo Uukwiyu muumbugantu wOndonga.

Omusamane gwomimvo 71, ewi lye lya fa ongendjo inali kugagana ashike nOndonga, ihe olyu uvika Owambo ayihe sho tu uvithile aapulakeni ayehe mombako yOradio, mOshakati.

Kalunga na hekeleke omuselekadhi, oyana nezimo alihe, osho wo Ongeleki ya ELOK sho ya kanitha omunashilonga ependa.

Sebulon Ekandjo

**TSEYITHA MBALA E-
LUNDULUKO LYO-
NDJUKITHI YOYE**

Dha za kep. 8

okulongwa, kutya ukriste oshike," osho omusita gumwe a tumbula noluhodhi olunene sho kwa li a tala omainyengo giilyo ya ELOK mUushimba omasiku ngaka.

Omukundu ngoka nkene iilyo ya ELOK mUushimba auhe yi na okumonenwa eyakulo lyiihwapo, ogwa kala ngashingeyi konyala oomvula heyali dha zi ko, ihe sigo onena inapu monika ondjila ombwanawa yoku gu kandula po.

Elelongeleki olya li lya thigilwa oshimpwiyu koshigongi shaasita shomumvo 1983 opo li tume aasita pomathimbo nomathimbo, ya ka menekele mUushimba nokuyakula aantu mbeyaka pambepo.

Nonando sho sha yekelelwa lumwe osha li hewa she ende nawa, onkene tuu pwa dhimbululwa, kutya eyakulo lyopakathimbo, halyo lya pumbiwa kaantu mbeyaka.

Aanashilonga yamwe otaa dhiladhila, kutya eputudho lyaayeangeliste ndyoka lya mwena ethimbo ele



Omweevaangeliste L. Amupolo ngoka a longo omimvo odhindjidhindji mUushimba. Nguka oye hu uvithile aapopi yelaka lyOshiwambo mOdoolopa yaVenduka kombinga yimwe yoshilando.



Molweuvitho lye lya kola nohali pewa ethimbo ele, lya gwana nawa omusita Elia Hai-pinge, okwa tseyika koyendji, hamOkahao amuke moka a lele egongalo ndyoka omimvo dhi vule 30, ihe nomOngeleki ndjika ayihe. Ngashingeyi ota li oshikwiila shevululuko.



Sebulon Ashipala, gumwe gwaamboka ya yapulilwa muusita.


mOngeleki, olyo lye etitha po oluhepo lu thike mpoka lwaanashilonga.

Manga aanashilonga yalwe ishewe yu uvite, kutya oluhepo olunene lwaanashilonga ndoka Ongeleki yi li mulwo, otalu ka konkolekwa natango ketopolo lyiikandjongeleki yopau-mbisofi, mbyoka tayi ka kutha natango aasita momagongalo, opo ya langekwe moombelewa oompe.

Manga yalwe yu uvite ko ishewe etopolo komukalo gwi ili, kutya olyo naanaa tali ka mana po ompumbwe yaanashilonga momagongalo.

Kape na mbudhi kutya okomukalo guni ompumbwe yi li po noye ya po, Ongeleki oyi na epandulo keigandjo lyaagundjuka mboka ya hala okuhepa pamwe noshigwana shawo. Manga kombinga onkwawo moprograma yeyakulo lyOmuntu mOngeleki, ndjika omwa pumbiwa okweetwa sha oshipe, opo omuntu kehe moshilongo shika a mone eyakulo lyiihwa po ngaashi tashi vulika.

(Tala wo okomenda mepandja eti 2.)



Omusita omupe Tomas Ndiwakalunga

AASITA AAPE MPOKA YA LANGEKWA

Aasita aape 11 mboka ya yapulilwa oshilonga mOsoondaha yeti 17.6.1984, Elelongeleki, ndyoka pamauthompango olyo alike li. na oonkondo okulangeka aasita, mbaka olye ya langeke ngaashi tashi landula:

1. **Adolf Hashikutuva,**
omusita omuyakuli
mEnhana
2. **Tomas Ndiwakalunga,**
omusita omuwiliki
mEndola
3. **Jonas Mweutota,**
omusita omuwiliki
mOkalongo
4. **Wilibard Shikesho,**
omusita omuyakuli
mOkahao
5. **Alpo Enkono,**
omusita omuwiliki
mOniimwandi
6. **Eliakim Shaanika,**
omusita omuwiliki
mEengolo
7. **Jason Mbadhi,**
omusita omuwiliki
mIipandayamiti
8. **Mateus Kapolo,**
omusita omuyakuli
moTshandi
9. **Sebulon Ashipala,**
omusita omuyakuli
mOkaku
10. **Halolye Nashihanga,**
omusita omuwiliki
mUukwiyuushona
11. **Jesaja lipito,**
omusita omuyakuli
mOntananga

Nandi pukululwe wo mushika

Evi ndyoka hali kuthwa kaalilasa pefumviko, e taye li umbile kombanda yoshiketha shomudhimba, taye shi ningi lutatu, ye omusita okwa yapula nale omudhimba, oshi li tuu mondjila nenge aawe?

Ngame ondi shi aniwa, ngele omudhimba ogwa lalekwa nale nuuyamba komusita opuwu ngaaka. Ngame ngele tandi laleke wo nakusa, shila otandi umbile ko lumwe aluke, sha gwana. Nenge ano onda puka? Pukululii ndje.

Petrus Shileka
Oshitayi

Elixumbato lovanyasha mOmina yaKlein Aub

Hamushanga wOmukwetu,
Ame omunashilonga mOmina yaKlein Aub,
handi longo pamwe novanashilonga vakwetu.
Onda kala handi lesa alushe oshifo
shOmukwetu. Paife onda hala ne okupopya sha
kombinga yovanyasha pefimbo eli lidjuu.

Paife moushimba omu na ovakainhu vahapu,
ovo va pukifa yo ovanyasha ovamati vahapu.
Omumati shimha ngo e likongele omukulukadi
waye, nokeumbo lavo kooxe yomumati ke
shiiivike ko vali.

Ovanhu va tya ngaha, onda nyengwa ne, kutya
ove na okumona ekumaido komukalo u lipipo.
Kongeleka oko haku monika omakumaido, iha i
ko, koyoongalele yovanyasha iha i ko. Ovanhu
ovo ova kalela ashike omalukanda.

Fiyo onaini hatu kala noshiwana shi li moixuna
i fike apa?

Martin R. Mwangingi

EGWEDHELOPO

MOMukwetu gwaMai 15/1984 omwa li epulo
kutya oshipango oshinipo oshinene shi vule
iikwawo, onda hala wo okugwedhela po sha.

Ngame wo epulo ndika onde li pulwa shi
vulithe lune. Pamuthika gwontseyo yandje, o-
nda yamukula, kutya iipango yoyene kayi
vulathane. Ihe kombinga yoshipango
oshitihamano, ngele owa hondele, nena owa
yona iipango ayihe omugoyi mushimwe ashike.

Tango manga inoo hondela, owa haluka, owa
shundula edhina lya Kalunga. Ino simaneka ho
nanyoko mokuvulika kuyo, owa yaka sho we shi
ningi meholamo. Ino yapula olutu lwoye ndoka
lu li otembeli yOmbepo yaKalunga.

MEtestamendi Ekulu ngoka a yono oshipango
shika, ina dhiminwa po, okwa dhipagwa
nomamanya. Pethimbo lyookuku mOwambo,
aahondeli ohaa fikwa po.

Loide N. Iiyambo

“Tu ilikanenei omina yaKlein Aub”

Omuleshi ta indile

“Ohandi indile kovaitaveli vakwetu muKristus, opo
atusheni tu ilikaneneni omina yaKlein Aub, osheshi
ohai yandje unene oiponga kovanaailonga vomomina
tuu omo.

“Eshi ohatu shi ningi, opo Kalunga a amene ovanhu
vaye komalutu nokeemwenyo,” osheshi Kalunga oha
udu omailikano (Iil.12:5-11).

Lavinia Nghitewa

Onkambadhala yi vule okumwena

Omolwokunwa iikolitha kwa pitilila
moshigwana shetu, otandi indile nesimaneko
enene kaavali aaholike, tu ninge po sha, pamwe
oshigwana shokomeho tashi imbwa okulandula
omukalo gwelongitho ewinayi lyiikolitha.

Oomeme onawa ngele u li metegelelo, waa
makele nando iikolitha. Idhidhimikila ngaa
oomwedhi ndhoka omugoyi, nando ito vulu.
Oku na aniwa aantu yamwe ihaa vulu
okwiidhidhimikila omalovu e ga lwete. Ihe shi
ninga ngaa opo u gamene okanona okashona
koalkoholi, manga ke li mela.

Ishewe okanona ngele ka monika, naampoka wo
otandi indile nesimaneko enene kutya mo-
kweenda kwoye nako mpeyaka naampeyaka,
waa ka pe nando iikolitha ngele to nu.

Kambadhala aluhe okweenda nokanima wa tula
mo uuya wontumba, nenge ontaku u ka pe,
peha lyiikolitha. Okudhunga oontaku
momagumbo naku pendulwe po noku
dhigininwe.

Aanona naa longwe noya thiminikilwe okunwa
ontaku, oshoka ngele ya hokwa iikolitha, itaa ka
uva we ontaku ontaye nando nayi dhungwe
ombwanawa ya fa shike.

Ino longa omunona gwoye okweenda nothilinga
mondjato, opo a pitule okunwa pokakamba ko-
ntumba pondjila. Shika osha kwatelela mo wo
nane aavali, tate nenge meme.

Omunona na putudhilwe okutseya uukalunga,
okuya kosikola yOsoondaha, kosikola
yepatudho nokuugongi ulwe waanona.
Omunona ngele ta yi kosikola kongeleka, nenge
palwe, na ye nontaku, a ka nwe, ihe hatombo
nenge efau.

Shika osha tseyika nawa kaalongisikola
yopomahala gamwe, sho aavali yamwc yaa
nakanasha noluvulo lwawo nonoshigwana
shawo, onke haa tumu aanona kosikola ye na
omakende ga zilwa iikolitha peha lyontaku.

Unene tuu aanona mboka momagumbo gawo
hamu dhungwa iikolitha. Ihe mboka ihaamu
dhunga, nane wo ohamu gandja iimaliwa,
ngaashi sha popiwa metetekelo. Shoka okuyona
po omunona nokuyona po oshigwana shoye
shokomeho. “Shi vudha mo manga inaashi
koka.”

Omuvali omuholike, kambadhala ishewe u
dhiladhile, kutya okomukalo gunipo to gamene
oshigwana shoye shokomeho, kombinga
yiikolitha. Oshoka iikolitha oya ninga onku-
ndana ondhigwa moshigwana shetu.

Tu kambadhaleni, ekwatho ohali zi kOmuwa.

Nduuviteko Ampweya

Edhimbulukitho

**Ngoka inoo futa natango oshifo
shoye shOmukwetu nuumvo, oto
indilwa u shi ninge mbala.**

Apa pa dja oingulu hai liwa

Nalenale oingulu oya li ya talika ko ngaashi eengongololo, oinima i nyanyalifa. Onghe ya li ashike ye lihanena omilola. ihe na kutya mwene olyelye. Efiku limwe eumbo laNdindangole naNdangule nokaana kavo Kapakete, ola kwa-twa kondalu yaNelyanga, konima yokuufana shuunduwa.

Vo hewa inava mona nande oshiponga. Ookutuna omulongo (oingulu) aveshe omo va monena oshiponga meumbo omo. Eshi ngeno Naufiku e ke va pa oikulya, Nangula yo e uya okuyokola oinima yavo mediko, ongulu eembelela oda tunhumana ashike.

Eshi ngo Nangula a kwata oshingulu osho shipyu, ye okwa pya, ye okwe lilafa. A pwilikine oshinima oshinyenye. Okwa duda ko vali ye okwa lya. Aveshe osho va ninga fiyo aveshe va lya nokuhe na ouxwenge nokuli.

Ova kala ashike hava ningi shimha tuu va hala okulya oshingulu, eumbo olo ashike hava tu okakuni komundilo.

Ovanhu osho va ka loloka eumbo hali pi momwedi luvali. Efiku limwe mushiinda shaye, okwe li vakele po, a tale eshi tashi ningwa. Okwa hanga ashike tava andjakana noingulu.

Okwa ya kouhamba nde ta ti: Ta, tatekulu, oingulu ya xula po moshilongo, mboli ooNdindangole naNdangule nokaana kavo Kapakete tave i li po. Ohamba oya ti kutya indeni nde tamu va mange, mu va ete noingulu ei va dipaa i eteni oku.

Ohamba oya tuma ovalumenhu vatano, nde eshi ngo va kuma koshingulu shipyu, vo ova pya, vo ove lilafa. Oh, oshinima oshinyenye. Ova duda ko vali nde tava li.

Eshi va kuta, ova twala ovaneumbo linya kouhamba noingulu oyo ipyu. Eshi ngo ohamba ya kuma oshingulu shipyu, yo oya pya, yo oye lilafa. Oshinima oshinyenye. Oya duda ko nde tai li. Oya lombwela ashike eenghwatwa:

Fikamei po opo, indeni komaumbo eni, ame itandi pangulile ovanhu oinima inyenye ngaha. Okudja opo fiyo onena eli, oingulu ohai liwa.

Atty L. P. Haininga

Omukiintu omule muuyuni auhe

Sandy Allen gwomimvo 28 oye omukiintu omuleleka muuyuni auhe pakonakono lyo "Guinness Book of World Records" moka omukadhona Allen ha longo momisium yayo.

Oku na uule woometa mbali oshinkwanu ndatu (2,3m). OgwomuCanada. Omulumentu omule muuyuni auhe oye Muhammed Alam Channa gwomuPakistan e na uule woometa mbali (2,5m) nokwa valwa 1956. Mbaka ayehe oye na omwenyo naagundiuka.

S. V. V. Nambala

15 taa kongo etokolo ya ninge iilyo ya SWAPO

Mokati komatumwalaka gomatilitho neso nomambandameko ngoka ga kala taga tuminwa Anton Lubowski (32), okwa tiwa omu na wo omaindilo 15 gAatiligane mboka taa kongo etokolo nayo wo ya ninge iilyo yongundu ya SWAPO.

Hahende Lubowski, Omutiligane gwtango muNamibia, ngoka e shi holola puuyelee, kutya ye okwa ningi oshilyo shongundu ndjoka ya lukwa kepangelo ongundu "yaakomunisi."

Omatumwalaka gomahaleloyambeko gomukumo kOmutiligane ngoka oga kungulukile megumbo lye, sho ga zi kAatiligane ooyakwawo, manga omahindo gokutilitha neso osho wo omambandameko gi ili nongi ili okwe ga tsakaneke wo uunene moongodhi dhaa na kutya odha zi koolye dhe ya megumbo lye.

Kakele kaamboka 15, taye mu pula omayeke nkene ye na oku shi enda ya ninge wo iilyo, ye mwene Lubowski ota ti oshe mu pula oomvula ntano a thike metokolo lya hugunina. Ngashingeyi oku uvite, kee na we siku na shuna ompadhi monima.

Nguka oye kwa li gumwe gwiiilyo yoSWAPO 37 mbyoka ya li ya kwatwa omasiku ga zi ko, noya tegelela epangulo 13 gaJuli. Shika osha ningwa pethimbo iilyo mbyoka yi ipyakidhila neyotho lyonyama mokatuthi kokukunda oonkwatwa ndhoka dha manguulwa kOntuntu yaRobben nokOmalinda, pomisioni yaKatoolika, poDöbra, popepi nOvenduka.

Uunona nondholongo

Mu SA ooyina yurunona 3,415 oya li ye edhililwa mondholongo pamwe nuunona wawo omumvo 1983. Inaku ulikwa oomvula dhuunona mpoka dha li dhi thike nenge omayono ngoka ga li ga kwatitha ooyina. (Star 12.6.1984).

Oombapila dha SA inadhi longithwa

Iilongo 74 muuyuni, ihayi taamba we omuntu e na oombapila dhuuthemba womalweendo dha SA (Pasport), osha tseyithwa koministeli yiikwameni, F. W. de Klerk momutumba gwokutota ooveta mu SA omasiku ga zi ko.

XX

Euvathano lyokondalaka yaBritania momina yaRossinga otali kundathanwa.

Omasiku ngaka SWAPO ota kongo ondjila ombwanawa yokufutitha Britania iimaliwa yi vule oomiliyona R 1260 omolwokufula mo kwe uuyamba womina yaRossinga popepi naSwakopo (Adv.12.6.1984)

Opu na wo einekelo lya kola, kutya siku limwe Britania ita ka ninga we manga okondalaka ompe yokulonga omina ndjoka, sigo evi lya

manguuluka. Ethimbo lyeuvathano lyiilonga ye momina ndjoka, otali ka pwa ko nuumvo pehulilo.

Botha ita talele po manga Amerika

Onkundana ya zi muAmerika, otayi ti kutya, omusamane P. W. Botha, oministeli yotango ya SA, ita talele po manga Amerika pethimbo ndika, ngaashi e shi ningi kiilongo yaEuropa muJuni. (Star 1.6.1984)

Uumbanda moshinima shoka aniwa ou li mpoka, kutya otashi vulika etalelopo lyomuwiliki ngoka tali ka pendula okwaauva ombili mAayamerika oyendji, e tashi yonene ompresidende Reagan ehogololo lye.

Ehogololo lyaAmerika oli li ko nuumvo muNovomba, nomupresidende Reagan okwa holola ehala lye, kutya okwa hala okuhogololwa natango.

Ontuntu ya kana

Aanongononi oya kumwa kekanopo lyonziya lyontuntu yedhina Maziwi, ya li momunkulofuta guuzilo waAfrica. Oya li nuunene woohekita 600. Kominkulo dhayo okwa li evi etokele hoka oonguti dha li hadhi valele omayi gadho. Ihe sho kwa ningwa ekonakono lyahugunina, okwa monika kutya ontuntu ndjoka kayi po we.

Shoka sha thigala po uuhupe owala uushona wevi, mboka tau vulu okusiikilwa komakuthikuthi nuupu. Omukwanepangelo gwaTanzania okwa tengeneke kutya ontuntu ndjoka tayi popiwa, oya kungululwa po ashike komeya, oshoka aakwati yoohi oya tete po omi dhayo; dhimwe oya tungitha nadhimwe oye dhi ningi iikuni. Sho ontuntu kaayi na we uukwatya wayo wopanshitwe, oya hengumuka po ihe.

Aakwashigwana yamwe yaTanzania, taa pangelwa komaitaalo goshikulushonale (ngoka ga lukwa: 'supersitions' mOshiingilisa), otaa ti kutya okukana po kwontuntu ndjoka otaku ulike ehulilo lyuuyuni.

Meitaalo ndika otashi vulika mu kale ngaa uukwashili washa, ashike ope na wo omahala galwe palwe muuyuni ga halakana po pamukalo nguka nenge ga mbugala...

S. V. V. Nambala

OKAMATI KA SI KUULEKE

Nuumvo muLondon omwa zi onkundana, kutya okamati kosikola, oka si sho ki ithindi uuleke wotyokolate, uule womasiku gane. Okamati Nigel Buckley komimvo 16, oka ongotele po megumbo lyawo ombaadhilila.

Eso lyako olya dhimbululwa kutya olye etwa koshikalimo shomuuleke "insulin" shoka hashi adhikwa wo nomosuuka, sho shu udha mombinzi yako. Lungamena iinima iitoye. (The Star 27.4.1984).

S. V. V. Nambala

OKUXUPIFA ONGOBE

ILE OMALODU?

Ku Sebulon Ekandjo

Epulo li li pombada, ola holokele moshongalele shounaimuna mOnandjokwe muMaalitsa neudo. Omundohotola wounamiti, Naftali Hamata, oye kwa li e li nyamukula. Moku shi ninga, okwa ulike tete ehistoli lediinino leengobe nomalodu mefimbo lonale nokwe li yeleanifa naasho tashi monika mefimbo lopaife.

Osha yela kutya, kemuhapu te mu twifa omhata moshinima eshi, kutya ongobe nomalodu, ihai kwatafana. Hamata okwa ulika yo konakwiiwa yoshiwana shetu, kombinga yediinino loinima oyo ivali ya yooloka. Omadiladilo aye otaa landula apa:

MONALE:

Keshe omumati okwa li omunahambo, nomalodu inaa pitikilwa oumatyona. Pefimbo lokulombo, eengobe ohadi uya peumbo, ovanhu tava li omashini nomaadi, osho yo oushoshu otaw holoka omolwokuwapaleka epya. Kape na ondjala.

Pefimbo olo, kombinga yomalodu, ohaa monika ashike ngenge pa holoka oshivilo. Kakwa li taa nyono hano elandulafano loilonga nolonghalafano meumbo nomomudingonoko.

Ongobe oya kandula po eemhumbwe dinene moshiwana. Oshivilo she ku hanga ombelela opo i li, oikolo ye ya po, oto futu. Kakwa li ovapika vomalodu.

PAIFE:

Mefimbo eli ovamati inava hala ko kohambo, shapo oto mu futu. Panghedi ei, omumati keshe oku kwete ehalasha pokati. Ovashamane eenghono davo da pwa po. Ava va mona omholo yokutambula eepenzela, oimaliwa shapo ota diki okandingosho.

Ava va longwa ounamapya, itava yandje ouyelele wa wana, oilonga oya efiwa omolwoku-nwa. Nomolwomalodu, ounona itava tekulwa

OMANDHINDHIKO GOKANONA KE NA UUVU WONDJALA

Itaka ndjanga ko itaka koko. Ngele oke na omvula yimwe, oka fa ashike ke na oomwedhi dhontumba.

Ohaka tameke taka zindi omagulu noompadhi nomaako, iikaha noshipala wo. Oshipa otashi tende sho sha fa tashi yugunuka notashi nanunuka.

Omafufu otaga tameke okuninga omashona, omapu gu ukilila. Olwaala lwago omandjimbi. Iikugumbo nayo wo otayi lunduluka, tayi ningi iindjimbi.

Kake na ehala lyokulya, ko taka kwatwa koshimela nonkungo. Elaka otali kukuta notaka ningi iilalo mokana.

Olutu lwako, otalu talala aluhe, noka fa aluhe kake na evululuko. Oke na oluhepo lwombinzi notaka kwatwa nuupu koombuto dhuuvu.

Konima omutima nehuli itayi longo we nawa. Oopelesenda (90%) dhokanona kondjala odha sa, ihe ngele oka mono ekwatho ewanawa, otashi vulika taka aluka.

[Omupangi]

vali. Ope na shili ovo tava kendabala, ndele ouyelele kau po.

EFIMBO TALI UYA:

Molwefimbo tali uya opwa pumbiwa omayele mawa nhumbi ediinino leengobe li na okuningwa. Nopefimbo tuu olo opwa pumbiwa okudipaa efimano lomalodu.

Manga nee taku lihongwa omikalo dediinino loimuna, olo yo efimbo taku lihongwa oiponga oyo tai etwa komalodu momalutu, monghalafano aishe.

Pefimbo olo hatu longekida onakwiiwa yoimuna yetu; hatu tukula eengobe pamaludi ado; domashini, doilonga nodombeleda, keshe oludi hatu li tekula paukwatya walo, opo yo pefimbo omalodu taa kanifa efimano lao mokati ketu. Ihatu ka kala noshilongo shihe na eengobe da pama omolwomalodu. Itapa ka kala vali ovalumenhu nomaumbo ehe na oovene omolwokunangelela moundingosho.

Ngaha opo apeke hatu kala tu na onakwiiwa i shii kulinekelwa.

Ehepaululo lokuNikea Konstantinople

ONDA ITAVELA KALUNGA UMWE:

Xe Omunaenghono adishe, Omushiti weulu nowedu nowoinima aishe i wetike naayo i he wetike.

ONDA ITAVELA OMWENE UMWE:


Jesus Kristus, Ewifa laKalunga, a dalwa kuXe omafimbo aeshe manga a ha li ko, Kalunga womuKalunga, Ouyelele womouyelele, Kalunga shili womuKalunga kashili, A dalwa ina shitwa, e nonghalo imwe naXe mwaaui oinima aishe ya shitwa ou omolwetu nomolwexupifo letu a kuluka a dja meulu, a ninga ombelela kOmhepo Iyapuki nokokakadona Maria, nokwa ninga omunhu:

Okwe tu valelelwa yo komushiyakano mounyuni waPontius Pilatus, a fya nokwa pakwa, a nyumuka efiku etitatu koufi, pamishangwa, a londa a ya meulu, nokwa kala omutumba kolulyo laXe: nota aluka ko mefimano okupangula ovanamwenyo novafi, nouhamba waye kau na exulilo.

ONDA ITAVELA OMHEPO IYAPUKI:

Omwene nomuyandjimwenyo, Ou ta di muXe nomOmona: Ou te li nyongamenwa nota fimanekwa pamwe naXe nomOna: ou a popya movaprofeti. Neongalo limwe liyapuki lovakriste aveshe lopayapostoli. Ohandi tambula Eshasho limwe ledimepo lomatimba, nonda teelela enyumuko lovafi nomwenyo wounyuni tau uya.

AMEN!



OMUKWETU

Oye oshifo shOngeleki Onkwaevangeli paLuther yomOwambokango. Ohashi nyanyangidhwa mOshinyanyangidho shOngeleki mOniipa. Omukuluntu gwoshifo omumbisofi Dr. Kleopas Dumeni. Amushanga gwoshifo omusita Sebulon Ekandjo.

Ondando yOmukwetu muNamibia naSuid-Afrika R5,00 komumvo. Palwe muAfrika R8,00 nokombanda yomafuta R11,00, komumvo. Mondhila R13,00.

Oondando nomambesitelo agehe naga tumwe kOmukwetu, Oniipa, P/Bag 2013, Ondangwa, 9000.

EV.LUTH.OWAMBOKAVANGO CHURCH PRESS
PRIVATE BAG 2013, ONDANGWA 9000
SWA/NAMIBIA

